

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2554 del 16/09/2021

Traduzione in ladino

“Arpejon per l davegnir”: I Museo Ladin de Fascia à orì la mostra a la jent

"Mie Museo. Arpejon per l davegnir / Per ereditare il futuro" L'è l titol de la mostra olache dai 14 de setember ai 11 de otober e dò dal 1m de dezember del 2021 ai 15 de oril del 2022, vegnarà metù dant la storia del Museo ladin de Fascia, scomenzèda del 1981 te dotrei cambres de l'Istitut Cultural Ladin e jita inant, pean via dal 2001, te la neva senta de anchecondi.

La storia del Museo la vegn contèda da chela jent che à dat sie contribut, metan al luster, ence ogec de maor enteress doné o dac adimprest e che à fat doventèr la jent protagonista.

L lurier de na comunanza donca, spartì fora da zii, ogec, testimonianzes e musc de jent che à volù lascèr a la generaziions neves informaziions e valores per entener l prejent e per endrezèr l davegnir.

Portèda dant te n percors temporèl e tematic, la mostra vel ge sporjer n deelpai a duta chela jent che te chisc egn à didà a meter sù l Museo Ladin, no demò se tolan del temp, ma soraldut se dajan jù con gaissa e gust per l mantegniment e l sparpagnament de la cultura ladina. L dialogh col vijitador l seghita enschin a la fin del percors, che l se sera sù co la proiezion del video “Musc e oujes del Museo” n mosaich de persones che conta che che vel dir se sentir ladins anchecondi delate de n spazie che somea n cantier, olache se pel lascèr n message e pissèdes neves per l davegnir del Museo. Na vijion de chel che l'è stat, che l'è e che doventarà l Museo ladin de Fascia, fata de maor condivizion e interazion col teritorie, aldò del moment de festa “mia majon, mia storia, mia parlèda”, acioche l'Istitut cultural Ladin ence tras l Museo, seghite a portèr inant con respet e gaissa l prezios lurier de stravardament, ma tel medemo temp che l se aure amò de più a la jent, a na vida che ogne un de nos posse sentir sia la realtà che chesta istituzion raprejenta.

Traduzion di Servijes Linguistics e Culturèl del Comun general de Fascia

(Traduzione a cura dei Servizi Linguistici e culturali del Comun general de Fascia)

(cdt)